

Senior Kategese
8 September 2019
Filemon vers 1-21

Agtergrond (Daar):

Filemon spreek die tema van vergifnis aan: Paulus dring by Filemon aan om sy wegloop slaaf te vergewe. Dit sou Filemon geld kos en sou ander slawe-eienaars dalk kwaad gemaak het. Vergifnis is nie maklik of verniet nie, maar dit is een van die kenmerke van 'n Jesus volgeling.

Ysbreker (Hier en Nou)

Gee aan elkeen in die groep kans om te sê wat die hoogtepunt en die laagtepunt van hulle week was.

Vertel mekaar van 'n situasie waarin jy was waar jy gesukkel het om jou getuienis as kind van die Here uit te leef.

Het iemand al iets aan jou gedoen wat jy sukkel om te vergewe? Noem voorbeelde van dinge wat ons sukkel om te vergewe.

Wat gebeur met jou wanneer jy 'n 'grudge' teen iemand het? Waarom dink jy moet Jesus volgelingen ander vergewe?

Word stil

Lees **Psalm 139: 1-6, 13-16** as 'n gebed.

Dink hieroor na:

- † Wat dink jy sien God wanneer Hy jou sien?
- † Hoe dink jy voel God oor jou?

Onthou, God kyk so na elke mens wat jou pad kruis.

Wat sê die Bybel? (Daar en Dan)

Lees **die fokus teks**. As daar tyd is, kan elkeen dit weer op hulle eie lees.

Aangeheg is die teks soos in Die Nuwe Testament vir Kinders deur Stephan Joubert, Jan van der Watt en Hennie Stander.

Goeiedag!

Van Paulus.

1–2 Ek is op die oomblik in die tronk. Ek is gevang omdat ek vir ander mense van Jesus *Christus** vertel. Timoteus is ook hier by my. Hy werk saam met my vir die Here.

Ek skryf hierdie brief aan jou, Filemon. Jy is my goeie vriend omdat jy ook saam met my vir die Here werk. Ek skryf ook aan die volgende mense:

- Aan Affia, 'n dierbare Christenvrou.
- Aan Argippus, wat hard vir die Here werk.
- Aan almal wat in jou huis bymekaarkom om die Here te dien.

3 God ons Vader, en die Here Jesus *Christus**, se goedheid en vrede is by julle.

Tyd vir Gebed

4–6 Filemon, ek sê elke keer in my *gebede** vir God baie dankie vir jou. Want ek hoor hoe lief jy vir die Here Jesus en vir ander *gelowiges** is. Ek bid dat jy elke dag sal onthou watter wonderlike dinge *Christus** vir ons almal gedoen het.

7 My vriend, jy maak my hart baie bly. Ek hoor jy is goed vir ander *gelowiges**. Almal praat daarvan. Hou so aan!

Filemon se Werker kom Terug

8–10 Filemon, ek wil jou 'n groot guns vra. Ek doen dit want ons al twee is kinders van die Here. Omdat ek spesiaal deur *Christus** gekies is om vir ander mense van Hom te vertel, kan ek jou seker beveel om te doen wat ek nou gaan vra. Maar ek sal nooit so iets doen nie. **Want Christene tree altyd in liefde teenoor mekaar op.** Daarom vra ek jou baie mooi om na my te luister. Onthou, ek

sit hier in die tronk omdat ek vir die Here werk. My versoek gaan oor Onesimus, een van jou werkers. Hy het nou die dag hier in die tronk beland. Maar ek het baie goeie nuus vir jou! Onesimus is nou 'n kind van die Here. Nadat ek hom van *Christus** vertel het, het hy ook 'n Christen geword. **11–12** Vroeër was Onesimus 'n slegte werker. Maar alles het nou verander, want hy is nou 'n Christen. Van nou af gaan hy sommer baie vir jou beteken. En vir my ook. Ek stuur Onesimus na jou toe terug. Ontvang hom asseblief baie vriendelik.

Jou Werker is nou jou Broer

13–14 Hier in die tronk het Onesimus baie vir my beteken. Ek wens hy kon nog 'n rukkie langer gebly het. Want hier is baie werk vir die Here. Eintlik moet jy my ook hier kom help. As Onesimus langer gebly het, kon hy my sommer in jou plek gehelp het. Maar ek sal hom nie hier hou sonder dat jy sê ek mag dit doen nie.

15–16 Weet jy, dit is eintlik goed dat Onesimus van jou af weggeloop het. Jy was seker baie kwaad toe jy hoor hy is weg. Maar nou kry jy hom vir altyd terug. En nogal op 'n heeltemal ander manier as wat jy gedink het. Hy is nou nie net meer jou werker nie. Nee, hy is nou jou broer in die Here. Hy is nou iemand vir wie jy baie lief moet wees. Onesimus was 'n wonderlike broer vir my hier in die tronk. Ek weet hy sal ook 'n goeie broer vir jou wees.

17–19 Filemon, as jy my as jou vriend beskou, dan moet jy Onesimus ook as jou vriend beskou. Ontvang hom net soos wat jy my sou ontvang. As hy iets daar by jou gevat het voordat hy weggeloop het, of as hy jou nog geld skuld, sal ek dit betaal. Dit belowe ek. Maar, Filemon, ek hoef seker nie vir jou te sê wat jy my alles skuld nie, of hoe? Want ek het jou van Jesus vertel. Daarom is jy nou 'n Christen. Moet daarom nie so haastig wees om rekenings vir my te gee nie.

20 My liewe broer, vat asseblief vir Onesimus met oop arms terug. Ek vra dit nie vir myself nie, maar ter wille van die Here. As jy dit doen, sal ek baie bly wees. Dit sal wys dat jy my broer in *Christus** se nuwe familie is.

Ek kom Kuier

21 Filemon, ek ken jou goed genoeg om te weet jy sal doen wat ek vra. Daarom skryf ek hierdie brief aan jou. Ek weet jy sal sommer nog baie meer vir Onesimus doen as wat ek vra.

22 Maak solank 'n kamer vir my reg. Een van die dae gaan ek vrygelaat word, want julle bid mos baie ernstig dat ek uit die tronk sal kom.

23–24 Epafras wat ook hier in die tronk is omdat hy met ander oor *Christus** Jesus gepraat het, stuur groete aan jou. So ook my helpers: Markus, Aristargos, Demas en Lukas.

25 Ons Here, Jesus *Christus**, is by elkeen van julle met sy goedheid.

Gesels dan hieroor:

- ✦ Noem enige iets uit die gedeelte wat jou geraak het.
- ✦ Of enige vrae wat jy nou het.

Hier:

- ✦ Wat leer jy oor Paulus uit hierdie brief?
 - † En oor Filemon?
 - † En Onesimus?
 - † Weet jy wat was die straf vir 'n slaaf wat weggeloop het?
- ✦ Paulus sê dat Filemon 'n keuse het hoe hy Onesimus wil behandel. Watter opsies was daar vir Filemon?
 - † Hoekom sou dit vir hom moeilik kon wees?

Hou die emosie-kaart omhoog. Gee paar sekondes van stilte sodat elkeen sy eie emosie kan identifiseer op die emosie-kaart. Nooi hulle uit om in kort sin te verduidelik watter emosie in hulle losgekam het tydens vandag se les.

Nou:

- ✦ Wat leer hierdie brief ons oor vergifnis? En oor versoening tussen medegelowiges wat oor iets stry?
- ✦ Maak 'n lys van al die 'familie'-woorde en temas wat Paulus gebruik tussen vers 8 en 22. Wat sê dit vir ons oor die Kerk, oor die gemeente?

✦ As jy verkeerd teenoor iemand opgetree het, wat vra dit van jou as Jesus volgeling?

Vra vir die groep aan watter verhoudings in hulle eie lewe hierdie teks hulle herinner het. Gebruik die verhoudings-kaart as hulpmiddel.

Voor:

- ✦ In Suid-Afrika sukkel mense om mekaar te vergewe. Wat dink jy sal gebeur wanneer die mense in ons land mekaar regtig vergewe?
- ✦ Dink julle Paulus het slawerny goedgekeur? Hoekom sê hy dan nie reguit dat dit verkeerd is nie? Is die Bybel dan teen basiese menseregte?

Gebruik die dromer-kaart en vra vir die groep wat hulle dink God se Gees vir hulle sê oor die verhouding of verhoudings waaraan hulle gedink het.

Verder:

- ✦ As jy iemand moet vergewe, moenie uitstel nie! Doen dit hierdie week nog!
- ✦ Om vergifnis te vra, beteken soms dat jy bereid moet wees om reg te maak wat die verhouding in die eerste plek seergemaak het.
- ✦ Hoe kan jy, soos Filemon, die wêreld vir ander 'n beter plek maak? Hoe help vers 7 ons hiermee?

Gebruik die verteller-kaart en vra vir elke deelnemer wat hierdie week vir hom of haar voorlê? Wat beplan hulle vir hierdie week?

Gebed:

Is daar enige iets waarvoor die groep vir jou kan bid?

Onthou julle nog die ABC van gebed?

Aanbidding

“Here, ek aanbid U, want...”

Belydenis

“Here, vergewe my vir...”

Voorbidding

“Ek bid vandag vir...”

Danksegging

“Dankie, vir...”

Eie behoeftes en toewyding

“Here, help my om...”